

■ COLUMNA

75 onns quarta lingua naziunala

DAD AITA DERMONT-STUPAN

Avant 75 onns ha il pievel svizzer acceptà la proposta da renconuscher il rumantsch sco quarta lingua naziunala, e quai cun 90% da las vuschs dals votants. Co che quai è vegnì uschenavant pon ins leger en il cudesch da Rico Valär: «Weder Italiener noch Deutsche! Die rätoromanische Heimatbewegung 1863-1938», cumparà la primavera passada.

Impressiunant da leger co che noss perdavants han cumbattì per nossa lingua, il tschientaner passà. E quai da l'emprim president da la LR, Giachen Conrad 1919, al Giurist Otto Giré ca.10 onns pli tard, dals scripturs Peider Linsel cun: «Ni Talians ni Tudais-chs! Rumantschs vulain restar» a Giachen Casper Muoth cun: «Stai si, defenda Romontsch...», da l'organiziun da students da quel temp, als delegads da la Lia Rumantscha e deputads al cussegl grond, dal cusseglier naziunal Giuseppe Condrau, fin pro'l cusseglier federal Etter che numna ils Rumantschs «Svizzers exemplarics, in pievel moralmain, mentalmain e spiertalmain ferm». (Piz 45, stà 2013)

Naturalmain che jau ma sent onurada da tutgar tar quest pievel rumantsch. Ma cun tge raschun? Avain nus cuntinua' ils ultims 30 onns a defender il rumantsch sco quarta lingua? I ma fa mal da con-



statar che nus Rumantschs – ed jau manai cunzunt quels en las valladas rumantschas – essan buns per raccoltar ils interess che politichers e persunas cun influenza, che vivan per gronda part ordaifer il territori rumantsch, defendan per nossa lingua, ma sche nus avain da far ina giada sezs in pass in vers l'auter, quai lura na vulain nus betg.

Lura na vulain betg esser Rumantschs, mabain Sursilvans, Sutsilvans, Surmirans u Engiadinais. E na be Engiadinais, ma Puters, Jauers u Valladers. E na be Valladers, ma da Zernez, da Scuol u da Sent. E quai na be da Sent, ma da la Muranza, nua ch'ils purs da la mesadad dadens dal vitg mettevan alp las vatgas, e betg forsa da Pra San Flurin, nua ch'i vegnivan messas las vatgas da quels vers Scuol. Ils uffants da la Muranza pertgirava ils vadels giu la Spinatscha ed avevan vaira cumbats cunter quels da Pra San Flurin che pertgiravan ils vadels ora Chompsenda!

Mo passads èn ils temps nua ch'ils uffants pertgiravan vadels. Las alps èn daditg fusiunadas. Las vischnancas èn sin buna via. Ils pievels sa maschaidan. Perquai na pudain er nus Rumantschs betg pli ans prestar dad ir mintgin si'atgna via. Premissa fiss da mussar a la proxima generaziun a scriver in rumantsch unifitgà. Co po Clau Solèr be pretender en ses referat per participants d'in curs da rumantsch che l'unitad rumantscha na saja betg necessaria?(LQ dals 18 da fanadur 2013)

Sche mintga Rumantsch cuntinuescha a vulair sia liongia speziala, e sch'ils Rumantschs na vulan e na ston betg savair leger ed enclerger e scriver documents uffizials rumantschs e fan quai pli gugent per tudestg, duai il pievel grischun decider sch'il rumantsch è anc degn da vegnir resguardà sco lingua uffiziala. Suentar po il pievel svizzer decider, sch'ina lingua che na vegn betg pli renconuschida uffizialmain è anc degna d'esser ina quarta lingua naziunala.

Be per discurren in pau Ben famiglia e per scriver in pèr sms na fai betg basegn da turmentar a noss povers uffants cun als far emprender a scriver rumantsch. 75 onns buna veglia e resguard vers quest pievel svizzer exemplaric basta.